



Apeqquteqaat aallaavigalugu inuit innarluutillit uagut inuiaqatigiittut pitsaanerusumik ilaatinneqalernissaat angusinnaaneripput apeqquteqaatigalugu saqqummiussamik siunnersuut. Qanoq iliuseqarnikkut ilumoortumik piviusorsioortumillu inuit timimikkut innarluuteqartut innarluutilittut pillugit inatsisimmi pineqartut ilinniartitaanermi aqqissuussinermut kingornatigullu suliffeqarfinnut isertinneqarsinnaappat? Qanoq ililluta ilinniartitaanikkut aqqissuussineq inatunerusoq aammalu suliffeqarfeqarneq inunnut timimikkut innarluuteqartunut periarfissiineq pilersissinnaavarput?

(Inatsisartunut ilaasortaq Agathe Fontain, Inuit Ataqatigiit)

aamma

Inuit annertuumik innarluutillit ilinniartitaanissamik qanoq iliorluni allatuulli neqeroorfigineqartalernissaat pillugu pilersitsinissaq siunertaralugu, matumani Aspergers Syndromimik nappaatillit ilanngullugit apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortat, Siumut)

Inuit Ataqatigiit Agathe Fontain aammalu Siumup Inatsisartunut ilaasortaat qutsavigaat pingaaruteqartumik oqaluuserisassamik saqqummiisimmata.

Oqartoqartarpoq inuiaat uuttorneqartartut sanngiinersaminnut qanoq iliuseqarnerisigut. Innarluutilittagut sanngiinnertatsinnut ilaappata, taava inuiaavugut sanngiitsortami ilinniaqqinnissaannut periarfissiinngitsut. Innarluutilittagummi meeraanerani immikkut aqqissukkamik atuartittarpagut, immikkut ilinniartitsisulerlugit, immikkut inilerlugit. Taamaaliortarpugut innarluutillit illersorniarlugit kisiannili aamma ilikkagaqarnissaat angorusullugu. Innarluutililli meeqqat atuarfiat naammassigaangamikku sunik ingerlaqqinnissaminni periarfissaqarpat? Sumi ilinniagaqarsinnaappat? Siusinaartumik sulisinnaajunnaarnersiuteqalertarpat? Isumaqarpunga innarluutilittatta, timikkut innarluuteqarunik imaluunniit allakkut innarluuteqarunik, meeqqat atuarfianiit ilinniarfinnut ingerlaqqittarnissaat isumagisariaqaleripput.

Inuit Ataqatigiit isumaqarpugut innarluutilittatta ilinniagaqarnissaat, suliffeqarnissaallu qulakkearniarlugit iliuseqartariaqartugut. Iliusissatullu periarfissat assigiinngitsut eqqartorniarpagut.

Siullermik taasariaqarparput innarluutilinnut akisussaaffik kommuniniilernikummat. Taamaamat kommunit akisussaaffigaat innarluutillit atortunik pisariaqartitsippata pissarsissutissallugit. Taamaamat innarluutilik atortussaminik kommunimit isumagineqassaaq.

Sanaartugassat, pisiniarfiit allallu pisussaaffeqarput timikkut innarluutilinnut iserfiusinnaassallutik. Tamakku tamanit malinneqarnersut tamatta eqqumaffigisassaraagut.

Inuit Ataqatigiit isumaqarpugut meeqqat atuarfiani immikkut atuartsineq ilinniarfinni tamani ingerlateqqinneqartariaqartoq. Ilinniarfiit tamarmik immikkut aqqissukkamik ilinniartitsinnaaneq sillimaffigisariaqarpat. Tassa inuusuttunut, inersimasunullu immikkut atuartsinermik pilersitsisariaqarpugut.

Taamatutaaq efterskoliutigut, højskolillu inuusuttunik immikkut atuartitassanik atuartuuteqarsinnaanissaat aningaasaliiffigisariaqarparput. Inuusuttagummi allat tamakkununga atuariakaasut innarluutilittatta isiginnaaginnassanngilaat, peqataaffigissavaalli.

Inuit Ataqatigiit isumaqarpugut inatsisiliortariaqartugut innarluutilit inuusuttut ilinniaqqinnissaannik periarfissiisumik. Inatsimmi qulakkeerqassaaq immikkut piareersakkamik ilinniagaqarsinnaaneq. Meeqqat atuarfianiilli piareersarneqariissaaq immikkut aaqqissukkamik sumut ilinniagaqarnissaq. Ilinniarfinnut pisinnaanngikkaanni, taava immikkut aaqqissukkamik suliffimmut sungiusarsinnaanissaq periarfissaasariaqarpoq. Inatsisiliorneq, peqqussusiornermiit nalunaarusiorneqarpat, taava ilinniarfiit inuutissarsiornermut ilinniarfiuppata imaluunniit ingerlaqqiffiusutut ilinniarfiuppata nalunaarummi ersittariaqarput immikkut tapersersorteqarluni aaqqissukkamik ilinniagaqarsinnaaneq.

Meeqqat atuarfianitulli immikkut aaqqissukkamik suliffimmut sungiusarsinnaaneq, ilinniarfinni ilinniagaqarsinnaaneq anguniartariaqarparput. Maannakkutuut ingerlanerput akueriuminaappoq, meeqqat innarluuteqanngitsut kisimik ilinniarfinnut periarfissaqartarnerat. Inuiaqatigiit inuit tamaasa pisariaqartippagut innarluuteqarpata innarluuteqanngippataluunniit, tamannalu ilinniarfinni suliffeqarfinnilu ersittariaqarpoq.

Inuit Ataqatigiit innarluutilittatta ilinniagaqarnissaat pingaartikkatsigu Inatsisartut oqaaseqaatissaattut siunnersuut imaattoq taperserlugu taaseqataaniarput:

Inatsisartut kissaatigaat, inuit innarluutilit pillugit inatsiseqarnerup iluani pineqartut, ilinniartitaanerup iluani aaqqissuussinermi aammalu suliffeqarfeqarnermi tunngasuni initunerusumik inuit pineqartut peqataatinneqarnissaannut pilersitsinissaq. Inatsisartut Naalakkersuisut kaammattorpaat naammassineqarsinnaanerusumik ullutsinnullu naapertuuttumik inuit pineqartut peqataatinneqarnerusumik suliniuteqarnissaq, taamaalillutik inuit taakku eqqissisaannarnagit, ilinniartitaanikkulli suliffissaqarnikkulli annertunerusumik peqataanissaat, taamaalillutik inuiaqatigiinni eqeersimaarlutik akulerunnissaat anguniarlugu.